



孝行錄

079
1987



孝行錄

仁
1957

門
1357
卷



孝行錄

明治四十年四月二日
市島館長氏寄贈

具呈二品銜安徽候補道石楷二品封職王
 沂知府銜候補直隸州知州前豐潤縣知縣
 謙命年運同銜前直隸宣化府保安州知州
 韓印知府用分發候補同知孫文川運同銜
 湖北候補知縣梅壽康前浙江湯溪縣知縣
 李元壽河南卽用知縣劉汝霖提舉銜候補

鹽大使李泰封本班前先選用知縣秦際唐
五品銜候選訓導方培容兼襲雲騎尉世職
江甯府廩生郭傑孝廉方正附貢生陶嗣元
浙江候補知縣田晉蕃江甯縣舉人汪士鐸
署東臺縣訓導舉人陳元恆候選教諭楊長
年候選訓導陳開周大挑教諭卓熒錄用教
職舉人甘元煥舉人田晉奎復設教諭朱桂

模候選直隸州州判龔坦署宿遷縣教諭沛
縣儀徵縣訓導李家誥候選通判黃慶承職
附貢生甘塏職附貢生甘增籌歲貢生就職
訓導張鑄前署淮安府教授贛榆縣訓導鄭
維杰廩貢生顧大璋廩貢生陳慶霖增貢生
錢遐附貢生王子杰附貢生伍雲附貢生程
奉璋上元縣附生吳嵩慶等

呈爲至行兼備追念弗忘公籲移詳

題請

旌表事竊維純修以飭紀爲先允矣太和翔洽
公論至蓋棺而定皇哉不朽馨香我

朝錫類推恩崇賢勵俗苟德行盡家修之職斯
鄉閭垂社祭之文茲有已故進士前蘇州府
學教授傅遇年系出商霖學承世澤讀書明

理早深烏烏私情睦族敬宗不啻鵲鴿急難
人皆無閒父母昆弟之言恩以漸推疆近期
功之族爲安樂爲憂患祇此赤子知能或居
家或服官蔚作人倫模楷溯自采蘭稚歲懷
橋髻年萊彩開顏嬉戲能娛暮景梓庭失怙
悲哀有過成人和丸畫荻彌殷寸草之心夕
膳晨羞常潔白華之養讀書隕涕王裒抱痛

於蓼莪力學安貧季路盡歡於菽水其生有
至性能孝於親也如此迨夫萱闈抱恙藥石
無靈依依愛日之誠切切呼天之泣已極九
閻之禱籲未驅二豎之膏肓於是割股乞靈
比折肱之術遂沈疴竟轉儼妙手之春回鬼
神憫其苦心婦孺欽其至性創痕在體憑寸
赤以抒誠喜色開眉邀彼蒼之降鑒其事親

侍疾至誠感神也如此及其先後居喪哀毀
盡禮父書能讀護持鄴架之編母訓克承涕
泣瀧岡之表尤難者當北上計偕之日正南
方告警之時願養志於慈幃棄浮名若敝屣
爲依親舍遂罷公車千里烽烟常侍在庭之
几杖一枝寄託不驚載道之干戈甫避賊氛
忽罹親疾帶恆不解藥必先嘗雖流離失所

不免鶴唳頻驚而定省如常仍懷雞鳴早起
但服勞而滌器肯謀祿而絕裾艱難險阻之
中依然孺子生死葬祭之禮無愧古人其孝
行之見於患難也如此至於誼重天倫情隆
羣季吹壘響和聽雨聯牀許武讓弟成名蘇
轍因兄力學以文章相劘切義若嚴師雖瓜
果必分嘗爰均同氣遂使劉家三叔成宰世

之經綸馬氏五良有傳家之簪笏其悌道之
實有可徵也如此迨夫改官蘇郡旅食申江
一匏如懸半菽不飽痛分飛之鴻雁未獲安
居憐避地之鷓鴣曾無棲託由五服而推疏
屬自三黨以迄媼親分甘共苦仁漿義粟之
施出險入夷屏履資糧之給狐裘已敝恆多
舉火之家鶴俸無多不吝廉泉之潤其孝悌

交修推於戚族也如此由是職守當官經營善後憫難民爲窮途無告發粟尤貴散財謂講院乃造士初基投戈更當講藝有廬舍有飲食有資斧涸魚如獲更生增膏火增齋舍增課程鳴鹿羣歌小雅而且濟濟衣冠之族敦行首重綱常寥寥灰燼之餘旌善不遺愚賤明倫立教楊龜山爰作人師經義名齋胡

安定何慚儒者其移孝作忠見之居官也如此厥後江甯克復請假修墳事必躬親路不憚遠歸來趙武哀感旁人劫後令威重依華表幸先塋之無恙補種松楸容他族之潛滋畧圖蔓草誰無祖父各有水原木本之思戒我子孫毋生雀角鼠牙之釁其推己之孝以成人之孝也如此綜核生平追維始末矢終

身之孺慕德望益隆仰素行於老成典型猶
在宜荷

聖世表揚之典用彰斯人孝悌之風爲此繕呈事
實加粘切結公叩

師臺俯賜移詳

旌表將見表微闡幽足壯俎豆烝嘗之色興賢
崇德彌增州閭鄉黨之光上呈

計呈事實冊一本結狀二紙

勅授文林郎

誥封通奉大夫生於嘉慶十四年四月十二日卒
於同治五年三月初一日年五十八歲子四
長鑾中書科中書歿次鎔花翎同知銜湖北
候補知縣隨帶加五級次鑫附貢生廣東候
補鹽課大使次鏞花翎直隸候補同知孫男
六曾孫一均未仕

一已故教授天性敦篤孩提時卽知愛敬父母
十三歲失怙哀痛逾於成人稍長事母先意
承志就傅後讀論語至父在觀其志父沒觀
其行嗚咽不能卒讀師異之曰此孝子也每
日自塾歸母必課所業教授晝夜攻苦所學
益進以母苦節常有志於顯揚曰吾學不成
何以對吾母此故教授孝行出於至性者也

一故教授之母素有手顫之疾平時侍奉扶掖頃刻不離道光九年母疾漸亟故教授每夕焚香籲天願以身代雖風雨必跪而禱涕泣苦語至家人不忍聞疾仍不瘳故教授乃割臂肉療之和藥以進母服藥後如寐忽覺霍然而愈教授諱其事人見其創痕宛然始知之此故教授孝行見於療疾者也

一故教授於咸豐二年會試已成行矣聞警遂止城陷奉母避難鄉間時賊氛逼近烽火燭天居民一夕數驚母忽遘疾斷難遠徙扶持左右頃刻不離其年四月母病危故教授百計求醫藥卒不效俟母喪葬畢乃始挈妻子他徙居喪哀毀骨立此故教授孝行見於居喪者也

一故教授爲江甯世族族弟遇昌幼而失怙寡母孤子恃教授以存活知遇昌聰穎飲食教誨垂數十年以所得束修助其膏火叔母屢欲令遇昌改業貿易以資餬口教授給其資斧勸令安心讀書遇昌果中順天鄉試舉人選湖北咸甯知縣改選興化教諭遇昌感兄甚每舉以告人而教授終其身無德色此故

教授悌道見於平時者也

一故教授改官後選授蘇州府教授時蘇省未復挈眷僑寓松江募鄉人至江甯省視祖墓而護持之族中有陷於賊者亦給以資令從閒道脫圍出族戚避難來依恆留之不去食指常數十人又代爲之謀生隨其人之材藝高下必位置得所而後已此故教授悌道見

於患難者也

一故教授之母苦節撫孤臨終時訓故教授曰
汝將來得一官當以活人教人爲心故教授
泣誌之不敢忘蘇省克復隨同官軍入城首
請 大憲安撫難民 大憲允之每一府屬
難民專委一人治其事特委故教授撫恤江
甯難民故教授以桑梓誼尤盡心遇有父子

叔姪同在難中者必招人局以賊之餘糧養
贍而資遣之不令失所迨遣散畧盡以餘糧
報充公用絕不染指此故教授孝悌之心見
於施行者也

一故教授於蘇省克復後見士人淪落至無以
爲生亟請 大憲興復正誼書院旋奉委充
監院督課甚嚴於士子之膏火當堂發給不

准書吏減扣各士子始有生機見孝子悌弟必力請旌表凡蘇屬表微闡幽之事皆力任之得請乃已此故教授推孝悌之心見於教化者也

一故教授於江甯復後各處祖墓俱敬謹修整種樹數百株其北鄉祖塋爲墳丁盜賣與回民已葬數塚族中擬稟官飭遷教授愀然曰

夫亦人子也爲已之祖宗而令人之祖宗不安於地下非所以教孝也與之約已葬者不令遷未葬者不得再葬回民感激涕零訟端遂息此故教授以孝悌及之他人者也

一故教授受母遺訓以教人爲心成進士後怡然就教職盡心教士以書生終其身病革日訓子鑾鎔輩曰子貧苦一生他無所慕惟欲

宜榮
 學行入學
 雖知對明里
 平孝出外
 工甯縣學
 學德

縣勘

江甯縣陸元鼎看得已故教授傅遇年孝思
 維則悌道允稱手澤猶存誦清芬於早歲膽
 丸彌苦決令器於他年獨將割股之誠算綿
 萱草深念同根之誼秀毓荆花百里改絃一
 鬢秉鐸戚郇沾其餘潤庠序賴以明倫洵為
 斯世楷模宜與

甯府縣學詳報查得江甯縣孝子傅遇年取
造事實冊結呈送前來臣覆核無異與

旌表定例相符既協輿評宜邀

寵錫除將事實冊結送部查核外謹會同兩江

督臣劉坤一江蘇學政臣黃體芳合詞具

題伏乞

皇上聖鑒勅部議覆施行謹

題請

旨

奉

旨該部議奏欽此

子順孫義夫孝友悌弟應

旌表者該督撫學政會同具題並取具冊結送

部核議又京師暨直省府州縣衛各建忠義

孝弟祠內立石碑應

旌表者題名其上身後設位祠中春秋致祭又

孝子順孫等於府廳州縣另建總坊毋庸按

名給銀其本家願建專坊及紳士願捐建者

均聽其便等因在案今江蘇巡撫題請

旌表江甯府屬孝子一名與

旌表之例相符應遵照奏訂章程令該撫轉飭

查明該州縣尚未建坊者給銀三十兩官為

另建總坊題名其上前經建坊者續行鐫刻

姓名於上毋庸再給坊銀已故者於忠義孝

弟祠內設位致祭再此本向歸彙題合併聲

明臣等未敢擅便謹

題請

旨光緒八年十二月十六日題十八日奉

旨依議欽此

金陵南門大街下江
考棚口黃起東刊印

